

**NATIONAAL ARCHIEF 'S-GRAVENHAGE**

**HANDSCHRIFTEN DERDE AFDELING**

**TOEGANGSNUMMER 3.22.01.01**

**INVENTARISNUMMER 333**

**JAARGETIJDEN DOOR HET GODSHUIS TE WARMOND**

**1 CHARTER VAN DE 6 CHARTERS**

**d. d. 21-01-1453**

**BEWERKING DOOR**

**ANTHONIUS VAN DER TUIJN**

**TE RHOON**

Voor eventuele vragen, opmerkingen en verbeteringen ([anthonius@alice.nl](mailto:anthonius@alice.nl)).

Als u gegevens uit deze bewerking gebruikt voor genealogische of historische doeleinden, dient een verwijzing naar deze bewerking vermeld te worden. Bij gebruikmaking van gegevens uit deze bewerking ten behoeve van publicaties, in welke vorm dan ook, moet een adequate bronvermelding naar deze bewerking worden vermeld.

Wij Baertout Gherijts zoen, Dirc Gherijts zoen ende Gherijt Gherijts zoen doen cond ende kenlic allen luden dat wij mit onsen vrijen wil voer ons ende voer onse nacomelinghe voer ons ouders zielen opghedraghen ende ghegeven hebben den godshuijs tot Warmonde derdalf hont gheestlants ende vijftien gaerden dat gheleghen is inde ambocht van Warmond ende heeft nu ter tijt belegghen an die afterzijde Jacob van der Woude, an die westzijde Alijt, Wouter Jan zoens weduwij mit horen kinderen, streckende vanden heerwech tot den pade toe. Item noch gheven wij den godshuijs voerscr. een half morghen gheestlants dat mede gheleghen is inden ambacht van Warmond ende hebben belegen an die oestsijde die monijken tot Warmonde, an die westzijde die selve monijken tot Warmonde, an dat noortende is een kerf streckende anden heerwech. Item noch gheven wij den godshuijs tot warmonde achte hont broeclants luttel mijn of meer gheleghen inden selven ambocht van Warmonde ende heeft belegghen an die oestzijde Jacoob van der Woude, an die westzijde Jan Sijmons zoen, streckende van die droghe Lee an die diepe Lee. Ende mit desen voerscr. lande ende rente sullen die godshuijs meijsters van Warmonde die nu sijn of hier namaels comen sellen, tot ewijghen daghen alle jaer tot twien tijden vanden jaer mede doen onser ouders memorij ende jaerghetijt, dats te weten des donredaghes ende vrijdages voer Meijdach so sellen alle jaer die godshuijs meijsters doen memorij ende jaergetijt Dirc Vernosen, Jutte sijn wijf, Gherijt Duker, Willem Duker ende Claes Duker. Ende dan sullen die priester ende die coster des avons vigheli sijngghen ende des morgens mijsse. Ende dan selmen setten drie kersen van was ende dan selmen gheven den priester des avons twee scellinghe ende des morgens drie scellinge ende den coster des avons enen scellinc, des morgens twee scellinge, den godshuijs meijsters te samen drie scellinge om dat sijt ijimmer trouweliken bewaren sellen. Die ander tijt vande jaer sel wesen des donredages ende des vridages na dertien dach. Ende dan selmen doen memorij ende jaergetijt Jan Duker, Baertout Baertouts zoen, Alijt sijn wijf, Gherijt Baertouts zoen ende Dirc Baertouts zoen. Ende dese memorij ende jaergetijt selmen alle jaer doen in alre manieren als voerscr. is. Voert so sel die priester tot Dirc Vernoesen ende Jutte sijn wijf tot haer beijder grave gaen om den anderen dach ende hier voer sellen die godshuijs meijsters den priester gheven ses ende twijntich scellinge tsiaers. Ende wes die voerscr. achte hont broeclants meer ghelden dan ses scellinge tsiaers, dat sellen die godshuijs meijsters den armen delen voir die kerc an scone brode tot drien tijden, dats te weten den twee deel tot dan twien jaerghetiden ende dat ande dertendeel Alre sielen daghe. Hier hebben bij ende over gheweest als tughe Willem Heijnrics zoen ende Jan Florijs zoen. Ende om dat wij Baertout Gherijts zoen, Dirc Gherijts zoen ende Gherijt Gherijts zoen voerscr. begheren ende willen dat dit aldus ijimmer tot ewijghen dagen ghehouden ende onghetroken wort, so hebben wij ghebeden Claes Jans zoen priester cureijt tot Warmonde dat hij desen brief over ons beseghelen wil. Ende ic Claes Jans zoen priester cureijt voerscr. om bede wil van Baertout Gherijts zoen, Dirc Gherijts zoen ende Gherijt Gherijts zoen voerscr., soe heb ic desen brief wt hanghende beseghelt mit mijnen seghel in teghenwoerdicheijt der tughen. Int jaer ons heren dusent vierhondert drie ende vijftich opten een ende twintichsten dach in januario.